



Terenga 2: Hōtaka 46 – kupu whakarite

Kei aku manu wheko ata o roto o ngā wao tapu o ō koutou whenua kua hoka mai kia tau ai ki runga ki te peka rākau taumarumarū o Ako. Nau mai. Tēnei te whai kia nanī te taiao i te reo korokī, i te reo korihi.

Hei Mahi Whakarongo

Hei tō ake i ō tātou whakaaro ki roto i te kaupapa o te rā, kua tīpakohia tētehi wāhanga o tā Te Piringa waiata-ā-ringa. Anei ngā āhuatanga hei kapo ake mā koutou:

1. E poroporoaki ana te tama ki a wai?
2. He aha ana kupu whakarite?
3. Tuhia ngā kupu tauhou ka rangona.

He Whakamārama

He huhua ngā kupu whakarite i te reo Māori hei whakaata, hei whakamārama, hei whakataurite rānei i te āhua o te tangata ki tētehi āhuatanga o te taiao. Ka tīmata ētehi rerenga kōrero ki ngā kupu 'Me he...', 'Me ko...' rānei. Koinei tētehi tīwhiri ki a koe, he kupu whakarite e whai mai ana. Anei ētehi taurira hei wānanga māu, hei whakamahi hoki māu i roto i ō mihi ki te tangata:

Me he korokoro tūi *You're like a sweet singing bird* He pūkenga waiata tō te tangata.
Me he manu au e kakapa. *I'm like a bird all aflutter.* He tangata āmaimai.
Me he kihikihi kei te waru. *Like cicada in the summer.* He huihuinga hoihoi.
Me he kōrinorino kōkopu. *Like a mottled trout.* He tangata purotu. He mea ātaahua rānei.

Hei Manatu

Ko te kaupapa hei manatu mā tātou i te rangi nei ko te rerekē o te kupu 'marama' i te kupu 'mārama'.

marama – te amiorangi e taiāwhio ana i tō tātou ao. Ka kitea i te rangi i ngā pō.

Ka tiaho te marama. Ka mahuta te marama i te pae.

marama – tētahi o ngā wehenga tekau mā rua o te maramataka

Hei te marama o Haratua taku rā whānau.

mārama – ka taea te kite ngā āhuatanga maha, kāore e pōuri

mārama – te āhua o te wai e kitea atu ai ngā āhuatanga o roto.

mārama – E māmā ana te kitea o te tikanga o te kōrero

Kia tika te whakahua o te kupu, kia mārama ai te tangata ki te ia o ō kōrero.

Hei Mahi

Rangahaua ēnei kupu whakarite:

1. He ika tūpuhi.
2. He taniwha hikuroa.
3. He maire tū wao
4. He kāhu kōrako.
5. He toka tū moana.

Whakautu:

1. He kupu whakawhiu i te tangata toupiore, matakū hoki.
2. He nui te aweawe o tēnei momo tangata, he nui hoki ana apataki.
3. He tangata pakari, pēnā i te rākau pakari o te wao, i te maire.
4. He kaumātua, mā nei ngā huruhuru.
5. Ahakoa ngā ākinga o te wā, kāore tēnei momo tangata e ngoikore, e hinga.